

Date – 04/08/2025

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Larsap, Gen (Retd) Vijay Kumar Singh-an ASF avanga sum leh pai channa nasa tak thleng leh mipuite khawsak leh nunphung a nghawng nasa chu veiawm a tih thu a sawi.
2. Mizoram chak lakluhna kawngpui Kawnpui leh Sairang inkar kawng chhiat avanga lirthei tlan theih loh avangin nitin mamawh a vang tawh hle.
3. Jharkhand Chief Minister hlui Shibu Soren chu vawiin khan kum 81 mi niin a thi
4. Phillipines President Ferdinand R.Marcos Jr. chuan vawiin khan ni nga cham turin New Delhi alo thleng.

<><><>

GOVERNOR

Larsap, General (Retd) Vijay Kumar Singh-an African Swine Fever-in Mizoramah kum 4 lai harsatna a thlen tawh avanga sum leh pai channa nasa tak thleng leh mipuite khawsak leh nunphunga nghawng nasa tak thlengte chu veiawm a tih thu a sawi.

Vawk pul hri African Swine Fever (ASF) chungchanga Mizoram dinhmun bakah department hmalakna leh hmachhawp tlangpuite sawipuiin vawiin khan Larsap, General (Retd) Vijay Kumar Singh-an A.H& Vety. Department Secretary Pu Lalsangliana leh hotu dangte chu Raj Bhavan-ah a kawm a. Larsap chuan vawk hrileng thunun tura AH& Vety. Department hmalakna, hemi kawnga harsatna tawh leh rawtna an neihte hriat a duh avanga meeting neih a nih thu sawiin, ASF avanga harsatna thlengte khuahkhirh turin Department mal hmalakna a tawk lova, line department hrang hrangte leh mipuite nena thawhhona tha neih a ngai a ni, a ti a. Harsatna leh rawtna an thlente chu theihtawp chhuaha lo bawhzui sak a tum thu a sawi bawk.

Vawiin meeting-ah hian AH& Vety. Department hotute chuan Mizoram chu ASF in a chenchilh tlat tawh avangin, khuahkhirh turin hridanna kalpui chu hmalak theihna awm chhun a nih thu Larsap hi hrilhin, tun dinhmunah India ramah ASF vaccine a awm loh avangin a siam chhuaktu Vietnam atanga lakluh dan a awm em tih ngaihtuah a tul thu an thlen a. Sawrkar laipui atanga fund hmuh kawngah

harsatna a awm avanga compensation duh anga pek theih a nih loh thu pawh an thlen bawk.

Mizoram chu Disease Diagnostic Laboratory tihchangtlunna tur, Pandemic fund project dawng tur phase 1 a state 14 thlan chhuah zing a a tel thu leh, he project hnuaiiah hian NABL accreditation nei turin hmalak thuai tum a ni a. Laboratory-ah hian kumin March atang khan sample 221 test niin heng zinga 142 te chu ASF a ni tih PCR hmanga finfiah a ni. ASF avanga harsatna tawhte zirchiang turin National Institute of Veterinary Epidemiology and Disease Informatics (NIVEDI) Scientist/expert-te biak fel an nih tawh thu leh September-ah Mizoram an rawn tlawh hman beisei a nih thu tarlan a ni a. Heng bakah hian ASF chungchang inzirtirna zau zawk kalpui leh thu pawimawhte inhrilhhrlat zung zung dan turte, Line Department dangte nena tanrual dan turte, vawk thi sawngbawl dan bakah pawimawh dangte sawiho a ni.

<><><>

HEALTH MINISTER

Health and Family Welfare Minister Pi Lalrinpuii'n Aizawl Civil Hospital-ah damlote tana taksa khawl thlenkhat thlak tura hmalak mek a ni a ti a, Organ thlak kawngah miretheite tan vanneihna kawl a eng tep a ti.

He thu hi vawiina Directorate of Hospital & Medical Education (DHME) Auditorium-ah State Organ & Tissue Transplant Organisation (SOTTO) Mizoram, buatsaiha '15th Indian Organ Donation Day', a hmanpuinaah sawiin, Health Minister Pi Rinpuii chuan Sorkar laipui nen tangkawpin, Mizoram chuan SOTTO Mizoram kaihhruaina hnuaiiah damlote tana mihring taksa khawl thlak theih tur, Organ transplant kalpui ve thei turin hma a la tan chho ve bek bek a, a bul tan nan, Civil Hospital Aizawl-ah Kal thlak thei turin hma lak chhoh mek a ni a ti a. India rama Kal natna enkawlina lama hmingthang tak, Institute of Kidney Diseases and Research Centre, Ahmedabad-te nen MoU buaipui mek a nih thu sawiin, Organ thlaknaah miretheite tan vanneihna kawl a eng tep tih a sawi a ni.

Byte: Health Minister Pi Rinpuii

Health Minister chuanm National Organ & Tissue Transplant Organisation (NOTTO) report-a a lan danin, India ramah kum 1-ah mi Nuai 2.5 bawr velin kal thlak an mamawh laiin, mi 5000 bawr chauhin Kal dawn tur an nei a; Thin thlak ngai mi Sing 5-ah mi 1500 bawr vel chauhin a thlakna tur an hmu a; Lung thlakna tur pawh kum 1-ah mi 5000-ah mi 200 aia tlemin an hmu tawk tih sawiin, India rama taksa peng thlak ngai mi tam tak zingah hian Mizo engemawzat an tel a, nunna chan phah hial pawh an awm tih sawiin, a mamawhtute hnena taksa peng pek - organ donation chu a ngaipawimawh hle a, Mizoramah pawh kalpui a nih ve theih nan health care facilities thuam chak tura hma lak mek zel a ni a ti a, mipui lamah a mamawhtute tana taksa peng pek, organ donate chungchang inzirtirna neih nasat a ngai a tih thu a sawi bawk a ni.

He hunah hian organ donation chungchang chu kalkhawm te hrilhfiah an ni a, an taksa peng mamawhtute tana petu leh dawngtute thusawi ngaihthlak a ni a, he ni puala organ donation pawimawhna Reels insiamsiaka titha zual 3 te hnenah lawmman pek an ni bawk.

<><><>

SHORTAGE OF ESSENTIAL COMMODITIES

Mizoram chak lakluhna kawngpui Kawnpui leh Sairanga inkar kawng chhiat avanga lirthei tlan theih loh avangin nitin mamawh a vang tawh hle a, khawsak phung a nghawng buai tawh hle.

Akashvani Aizawl zawhna chhangin, wholesale dawr leh eichawp dawr kai hrang hrangte chuan bungraw lak tur a vang tawh hle tih an sawi a, abikin bawngnhute chu kar 2 vel lak tur a awm tawh lova, Amul leh Nestle thil siamchhuah bakah tel, dal, chini, buhfai, biscuit, butter, coffee powder leh bungraw dang te pawh lak tur a vang chho tawh hle an ti a, pick up truck hmangin kar 2 chhung velin bungrua vawikhat a thleng ve leh zeuh thin tih sawiin, tuna an bungraw stock sa tlemte bak chu lak belh tur a awm tawh meuh lo an ti a ni.

Eichawp Dawr neitu Pi Rinpuii chuan Guwahati atanga bungrua direct a la an nih thu sawiin, kawngchhia avang hian bungraw phur lirthei te chu tunhma a an tlan thinna man aia sang pawhin an tlan duh tawh lo tih a sawi a, July thla tira bungrua an lakluh bak chu bungraw lut a la awm leh mang lo tih a sawi.

Byte: Pi Rinpuii

Eichawp dawr bakah hian insakna hmanraw zawrhna dawr te, damdawi dawr te pawhin kawngchhiat hnuah an distributor te hnen atangin stock lak tur a vang tawh hle a, mipui mamawh bungrua leh damdawi awm tawh lo a tam tawh thu an sawi a. Thingpui dawr neitute pawhin bawngnhute leh tel lei tur a van avangin eitur siam kawngah harsatna an tawk chho mek tih an sawi a ni.

Lirthei hmanga eizawng, two-wheeler leh four wheeler taxi driver te pawhin kawngchhiat avanga petrol lak tur mumal a awmlah avangin harsatna an tawk mek tih an sawi a, petrol la tura hun rei tak tak intlar a ngaih thin avangin passenger tam tak an hloh phah thin tih an sawi a, petrol pump thenkhatah coupon chauha a lak theih avangin coupon an nei ve lova, petrol black a zuar ten an an ti to a, an lei ve ngam loh avangin harsatna an tawk mek tih an sawi a, petrol chu a bura lei phal lo se, lirthei tanky daih chauh lei phal thin se an tih thu an sawi a ni.

Byte: two- wheeler taxi driver

College leh University zirlai thenkhatte bakah school naupang hruaitu nu leh pa thenkhatte pawhin petrol vang chuan nunphung a tihbuai thu an sawi a, petrol duh duh huna lak tur awm lo leh a lak theih huna rei tak tak intlar a ngai chuan an hun a heh hle a, an tih tur tam tak an thulh phah a, an kalna turah te an tlai phah tih an sawi a, hetihruah hian mipuite chuan an lirtheia leng bak chu petrol chhekkhawl tum thin lo se, chatlak awm lova petrol lak tur a awm reng an rin thu an sawi bawka a ni.

<><><>

MNF

Chief Minister hlui, MNF President Pu Zoramthangan Mizoram Sawrkarin a ruka State Capital Aizawl atanga Thenzawla sawn a tum dan kalphung chu thil kalhmang a ni lo a ti.

Vawiina MNF Party Office Mizo Hnam Run-a an party political sessionah he thu hi sawiin MNF President chuan, Mizoram state Capital Aizawl hi Thenzawlah sawn dawn pawh nise, Aizawl mipui tam zawk fein rem an tihpui loh tur a ni a. Rem an tihpui loh mai ni lova, an sawrkar kalpui dan kalphung chu an nuih tiza tur a ni. Tun dinhmunah Khawpui sawn chu thil harsa tak, sum leh pai tam tak luanralna tur leh mi tam tak nghawng tur a nih avangin, mahni duhthua thil kalpui ngawt chi a nilo, a ti bawk.

Chief Minister hian Aizawl khawpui tawt lutuk tihziaawmna tura ‘peace city’ din tum a nih thu bak mipui ah puanzar a la nei lo tih sawiin, NGO te leh Party hrang hrang bakah Zoram mipuite pawh rawnna pakhat mah a awm hriat a ni lova. Hetiang thu liantham hi chu Cabinet Meeting thutlukna tal pawh awm tur nia a lan lain, chutiang chu Zoram mipuite hian an hrelo a, Chief Minister thil tih dan chu thil nihphung pangngai nilo, mipuite tana pawmpui remchanglo a ni a, MNF tan pawh Khawpui sawn tum dan kalphung chu pawm chi ni lovin, a thalo an ti takzet a ni, a ti bawk.

UD&PA Dept chuan Thenzawl Peace City project chu state capital sawnna tur project niawmin tunhnaiah sawi a awm a. Hei hi sorkar laipui atanga lehkha lokalah ziah sual palh a awm vang a ni a ti a.

Thenzawl Peace City project Detailed Project Report (DPR) siamna tur atan hian sawrkar laipui, Ministry of Housing and Urban Affairs (MoHUA) chuan cheng vbc10 a sanction tawh a, state capital sawnna atan ni lovin Thenzawla Peace City atan DPR pawh ruahman mek a ni tih thuchhuah siamin a sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

JHARKHAND

Jharkhand Chief Minister hlui Shibu Soren chu vawiin khan kum 81 mi niin a thi a. President Droupadi Muru, Prime Minister Narendra Modia leh ram hruaitu hrang hrangten an ui thu an sawi. Pu Sorena hi kal tha lo leh stroke avangin thla khat leh a chanve liamta atang khan enkawl a ni tawh a. Sri Ganga ram Hospital ah a thi a ni.

Shibu Sorena hia kum 1944 January ni 11 ah Ramgarh district chhunga Nemra kuaah a lo piang a. Kum 1970 ah politic zinkawng bultanin Jharkhand Mukti Morcha (JMM) party a din a. Lok Sabha inthlanah tum 8 thlan tlin a ni tawh a. Kum 2004 khan UPA sawrkarah Union Coal Minister a ni tawh a. Jharkhand Chief Minister tum 3 ani tawh bawk a. Tunah hian Rajya Sabha member ni mek bawk a ni.

Vawiina Rajya Sabha rorel inkhawmah amah sun nan rorel lovin vawiin atan tihtawp a ni a. Jharkhand ah hian ni thum chhung sun a ni ang a. August ni 4 leh ni 5 ah hian sawrkar office zawng zawng khar a ni ang.

<><><>

PHILLIPINES

Phillipines President Ferdinand R.Marcos Jr. chuan vawiin khan ni nga cham turin New Delhi alo thleng a. Tun tum hi President Marcos-an India a lo tlawh vawi khatna a ni a. Naktukah Prime Minister Narendra Modia nen an inkawm ang. President Marcos hi First Lady Louise Araneta Marcos leh sawrkar mi pawimawhten an rawn tawiawm a . An zingah hian Cabinet Minister leh official senior te an tel ang. Sumdawng engemawzatin an rawn zui dawn bawk a ni.

<><><>